

聲畫集

二

十二



聲畫集卷第三

贈寫真者

贈寫真者

白樂天

子騁丹青日子當醜老時無勞役神思更畫病容儀迢遞麒麟閣圖功未有期區區尺素上焉用寫真爲

贈寫御容妙善師

蘇東坡

憶昔射策干先皇珠簾翠幄分兩廂紫衣中使下傳詔跪奉再拜聞天香仰觀眩晃自生暈但見曉色開扶桑迎陽晚出步就坐絳紗玉斧光照廊野人不識日月角髣髴尚記重瞳光三年歸來真一夢橋山松檜淒風霜天容玉色誰敢畫老師古寺晝閉房夢中神授心有得

覺來信手筆已忘幅巾常服儼不動孤臣入門涕自滂
元老侑坐鬚眉古虎臣侍立冠劔長平生慣寫龍鳳質
肯顧草間獮與獐都人踏破鐵門限黃金白壁空堆牀
爾來摹寫亦到我爲是先帝白髮郎不須覽鏡坐自了
明年乞身歸故鄉

贈寫真何充秀才

君不見潞州別駕眼如電左手挂弓橫撚箭又不見雪
中騎驢孟浩然皺眉吟詩肩聳山饑寒富貴兩安在空
有遺像留人間此身常擬同外物浮雲變化無縱迹問
君何苦寫我真君言好之聊自適黃冠野服山家客意
欲置我山巖中勲名將相今何限往寫褒公與鄂公

贈李道士

并序

駕部員外郎李君宗固景祐中良吏也守漢州有道士尹可元精練善畫以遺火得罪當死君緩其獄會赦獲免時可元八十一自誓且死必爲李氏子以報可元既死二十餘年而君子世昌之婦夢可元入其室生子曰得柔小名蜀孫幼而善畫既長讀莊老喜之遂爲道士賜號妙應事母以孝聞聞其寫真蓋妙絕一時云

世人只數曹將軍誰知虎頭非癡人腰間大羽何足道
頰上三毛自有神平生狎侮諸公子戲著幼輿岩石裏
故教世世作黃冠布襪青鞋弄雲水千年鼻祖守關門

一念還爲李耳孫香火舊緣何日盡丹青餘習至今存
五十之年初過二衰顏記我今如此他時要指集賢人
知是香山老居士

樂天爲翰林學士
奉詔寫真集賢院

贈寫真李道士

蘇子由

君不見景靈六殿圖功臣進賢大羽東西陳能令將相
常在世自古獨有曹將軍嵩高李師掉頭笑自言弄筆
通前身百年遺像誰復識滿朝冠劍多偉人據鞍一見
心有得臨窗相對疑通神十年江海鬚半脫歸來俛仰
慙簪紳一揮七尺倚牆立客來顧我誠似君金章紫綬
本非有綠葉黃籀甘長貧如何畫作白衣老置之茅屋
全吾真

張秀才見寫陋容

潦倒形骸山上樗每經風雨輒凋疎勞君爲寫支離狀
異日長看老病初落筆縱橫中自喜賦形深穩妙無餘
偶然挂壁低頭笑俱幻何妨彼亦如

客有寫真者見予因以三詩贈之

李誠之

嗟予少也賤到老尚無功方寸浮名外流年兩鬢中對
鏡猶慚愧圖寫若爲容

文命力能平水土阿衡功亦格皇天形容不上麒麟閣
當日君臣任自然

難逢古鑑明忠腹長似騷人帶病容幾向清溪曾照見

萬尋巖壑一青松

贈傳神大師

黃裳

闕下遊多日溪邊過幾春
數圖人欲活一筆自如神
不寫俗中態謾留雲外身
丹青如邈我道貌似山人

贈金陵傳神者李士雲

王荆公

衰容一見便疑真
李氏揮毫妙入神
欲去鍾山終不忍
謝渠分我死前身

風雲雪月

省試觀慶雲圖

柳子厚

設色初成象卿雲示國都
九天開秘祉百辟贊嘉謨
抱日依龍袞非煙近御爐
高標連汗漫向望接虛無
裂素

榮光發舒華瑞色敷恒將配堯德垂慶代河圖

吳熙老所藏風雨圖

潘邠老

我遊匡山夏將杪赤日青天萬山遶忽然風雨動地來
震氣乘雷離電繞一川煙靄失東西萬里乾坤錯昏曉
香爐高峰危欲墮石門細路人心勦江翻那聞得計魚
木拔豈有安巢鳥須臾雲過雨脚收依舊晴暉著叢篠
羣山歷歷在眼前恰似憑高日方曉誰將此景入畫圖
數幅生綃盤礴了吳丞此畫絕代無張公此詩古來少
讀詩觀畫興未窮北窗風涼退自公使君意消三伏中
未可鞭箠催青銅

熙老在羅田催科
不用鞭箠而辦

江月圖

崔德符

冥冥一葉輕不知水與天獨于顥氣中仰見素壁圓超
然狂道士起視清夜闌自拈白玉笛吹此江月寒想當
萬籟息逸响流空煙我從江海來形留意先還何當買
漁蓬追此水墨仙

王氏雪圖

王荊公

崔嵬相映雪重重茅屋柴關在半峰想有幽人遺世事
獨臨青峭倚長筇

題王維江行初雪畫

蔡持正

吳兒龜手網寒川急雪鳴蓑浪拍船青弋渡頭曾臥看
令人却憶十年前

跋趙朝議江行初雪圖

守中
志源

陳子高

我本孤舟蓑笠翁雪崖煙樹一生中如今不向江湖去
鬪艦旌旗照水紅

雪岫圖

大年貌得寒江雪鳬雁沙頭野杳微箇裏有詩誰會得
情知不道一蓑歸

州郡山川

嚴公廳宴同詠蜀道畫圖

得空字

杜工部

日臨公館靜晝列地圖雄劒閣星橋北松州雪嶺東華
夷山不斷吳蜀水相通與與煙霞會清尊幸不空

奉觀嚴鄭公廳事岷山沱江畫圖

得忘字

沱水臨中座岷山到北堂白波吹粉壁青嶂插雕梁直

訝杉松冷兼疑菱荇香雪雲虛點綴沙草得微茫嶺雁
隨毫末川蜺飲練光霏紅洲葢亂拂黛石蘿長暗谷非
關雨丹楓不爲霜秋成懸圃外景物洞庭旁繪事功殊
絕幽襟興激昂從來謝太傅丘壑道難忘

王處士草堂壁畫衡霍諸山

劉長卿

愛此衡霍近卷簾如可扳能令堂上客見盡湘南山青
翠千萬狀飛來方丈間歸雲無處滅去鳥何時還勝事
日相對主人常獨閑清陰滿四壁佳氣生重關頗與宿
心會看看慰愁顏

題劉相公三湘圖

郎士元

昔別醉衡霍爾來憶南州今朝平津邸兼得瀟湘遊稍

辨荆門樹依然芳杜洲微明三巴峽咫尺萬里流去鳥
不知倦遠帆生暮愁涪陽指天末北渚空悠悠枕上見
漁父座中常狎鷗誰言魏闕下自有東山幽

荅白杭州郡樓登望畫圖見寄 張籍

畫得江城登望處寄來今日到長安乍驚物色從詩出
更想工人下手難將展畫堂偏覺好每來朝客盡求看
見君向此閑吟意肯恨當時作外官

次韻周邠寄雁蕩山圖二首

指點先憑采藥翁丹青化出大槐宮眼明小閣浮煙翠
齒冷新詩嚼雪風二華行觀雄陝右九仙今已壓京東
此生的有尋山分已覺溫台落手中

西湖三載與君同馬入塵埃鶴入籠東海獨來看出日
石橋先去踏長虹遙知別後添華髮時向尊前說病翁
所恨蜀山君未見他年攜手醉郫筒

宋復古畫瀟湘晚景圖三首

西征憶南國堂上畫瀟湘照眼雲山出浮天野水長舊
游心自省信手筆都忘會有衡陽客來看意渺茫
落落君懷抱山川自屈蟠經營自有適揮灑不應難江
市人家少煙村古木攢知君有幽意細細爲尋看
咫尺殊非少陰晴自不齊徑遙趨後崦水會赴前溪自
說非人意曾經入馬蹄他年宦遊處應話劔山西

虔州八境圖八首

坐看奔灘遶石樓使君高會百無憂三犀竊鄙秦太守
八詠聊同沈隱侯

濤頭寂寞打城還章贛臺前暮靄寒倦客登臨無限思
孤雲落日是長安

白鵲樓前翠作堆縈雲嶺路若爲開故人應在千山外
不寄梅花遠信來

朱樓深處日微明阜蓋歸時酒半醒薄暮漁樵人去盡
碧溪青嶂遶螺亭

使君那暇日叅禪一望叢林一悵然成佛莫教靈運後
著鞭從使祖生先

却從塵外望塵中無限樓臺煙雨濛山水照人迷向背

只將孤塔認西東

煙雲縹緲鬱孤臺積翠浮空雨半開想見之罍觀海市
絳宮明滅是蓬萊

回峰亂嶂鬱叅差雲外高人世得知誰向空山弄明月
山中木客解吟詩

蹇師嵩山圖

并引

蘇子由

葆光法師蹇君未嘗至嵩山欲往遊焉元祐九年
春磐栢都下得古畫一幅以示其客客曰此嵩山
圖也予昔嘗遊焉峰嶺徑遠觀刹皆是君喜曰此
將以導予也吾昔熙寧中自陳之洛往來皆出嵩
少之間時方重九與偕行者約曰與子於此登高

乎今筋力尚強可以一往異日復至或不能矣今年三月以罪出守汝州聞此州在嵩少之陽登城北望可以盡得其勝君何時爲此遊吾將舉酒與子相望雖不能同亦庶幾焉系之以詩曰

峻極登高二十年汝州回望一依然君行亦是高秋後
試覓神清古洞天

孫少卿鹿頭山詩并畫圖二首

頤景修

劉莘老

誅茅搜險旋尋真聞說仙巖一日新佳境留連應有待
先時登覽豈無人披榛好石來如召隨手清泉應若神
不獨山中興勝事幾多風愛在邦民